

SANTO-ESTELLO

Counggrès-festenau dóu Felibrige à Pertus dóu 7
au 11 de jun 2019 (pajo 7)



Prouvènço d'aro

Tóuti li mes, lou journau de la Prouvènço d'aro

Jun de 2019

n° 355

2,10 €

Muraio

Mistralenco

À-de-rèng coume à Jounquiero quand danson, se pòu pas miés dire davans aquelo meravihouso fresco, un bèu simbèu pèr tóuti li felibre e apareire de la lengo, lou retra de Frederi Mistral es jamai esta tant grand. Li Jounqueiren e soun municipe que fau benastruga, an pas óubliada que lou mai grand de nòsti pouèto miejournau, lou Mèstre de Maiano, prèmi Nobel de literatu-ro, mai subre-tout grand coumbatènt pèr sauva nosto lengage. “ *Sabèn proun que, à dre faire, lis escolo auto e basso devrien, dins lou Miejour, adouba l'estrucioun counfourmamen à nòstis usage, à nòsti besoun, à nosto naturo. Se jamai lou bon sèn, la liberta, lou dre règnon en aquest mounde, acò-d'aquí vendra, acò-d'aquí sara.* ” Soun coumbat es toujours d'actualita quand se sagato mai, vuei, l'ensignamen de nosto lengo dins lis escolo. Basto soun sant signau es toujours aquí sus aquelo muraio, li Jounqueiren fan vèire que l'ausisson toujours pèr que noun s'arrouino lou mounumen escrèt.

D'un coustat i'a Maiano à-n-un vin-tenau de kiloumètre de Jounquiero, d'un autre, à-n-uno memo estirado, i'a Nime e lou souveni d'Anfos Daudet, caricaturisto de noste país, mai tam-bèn felibre mistralen, que parlè nosto lengo enjusqu'au darnié jour coume lou racontò soun ami, lou pouèto de Bello-Gardo, Batisto Bonnet.

Es aquéu d'aquí que prenié l'eisèmples de Jounquiero dins sis escrit :

— “ *Se voulèn travaia de cor e d'amo au revieure de nosto lengo, que nous ane de coumbatre, avèn que de i'ana coume ié van à Jounquiero, qu'a rèn desóubliada de nòsti tradicioun...* ”

Tourna-mai, aro, la provo es aquí dóu mantèn jounqueiren de noste pas-sat tradiciounau em'aquelo fresco, en esbrihaudant oumenage i dous grands escrivan de l'encountrado que se poudran jamai óubliada.

Oscò Jounquiero !

B. G

Mistral e Daudet en façado



Jounquiero-Sant-Vincèns, galant vilajoun en Terro d'Argènço sus lou camin Roumiéu proche de Bèu-Caire, óubliado pas li persounage glourious de soun passat, en rendènt oumenage à Frederi Mistral e Anfos Daudet pintura, à bello visto e en grand retra davans un païsage jounqueiren de vigno e d'óulivié, sus li muraio d'oustau d'uno de si placeto, ournado tam-bèn d'uno vertadiero fount.

Aquelo grando e poulido fresco de mai de 70 m² es l'obro de Danis Carencò de Sant-Roumié-de-Prouvènço que ié prengué cinq mes de tèms. Es estado realisado dins l'encastre de l'ajudo de

la Regioun Ócitanio pèr requalifica lou cèntre de la coumuno, ouperacioun pèr revalorisa, de-bon, l'espaci public e lou cor dóu vilage.

L'inaguracioun óuficialo d'aquelo pintura muralo se faguè lou 3 de mai en presènci de Carolo Delga, anciano menistro, presidènt de la Regioun Ócitanio, de Juan Martinez, presidènt de Coumunauta de coumuno Bèu-Caire Terro d'Argènço, de Jan-Mario Fournier, maire de la coumuno de Jounquiero-Sant-Vincèns, proumié vice-presidènt de la Coumunauta de coumuno Bèu-Caire Terro d'Argènço.

Dono Carolo Delga, dins sa dicho ramen-tè qu'èstre presidènt de la Regioun, es èstre presidènt de 4500 coumuno que tóuti servon au desvouloupamen ecou-noumico e souciau. Mai, au son de la Coupo Santo, aquí souto lis image di dous grands escrivan miejournau i'anè d'afourti que la culturo es lou bèn lou mai precious, veitour de toulerènci e d'umanita.

Pièi, à-de-rèng, l'oumenage s'acabè bèn-segur à l'entour dóu vèire de l'amis-ta ounte lou maire Jan-Mario Fournier manquè pas de dire qu'aquel acamp permeteguè de pourta à la couneis-sènço de la Regioun li doursié li mai impourtant pèr l'aveni de la coumuno.

Folcò de Baroncelli

Vint an es un bèu tèms, mai lou pegin espèro pas lou noumbro dis annado...

Pajo 3

Dóu grand debat à l'Éuropo

La proupagando de bono gouvernanço de la Franço s'esquiho en Éuropo ...

Pajo 2

Lou recaufamen climati

Lou poun sus noste climat qu'es aro coumpletamen destimboula...

Pajo 5